



## Istraga: SIPA o mogućim nepravilnostima pri nabavci goriva od BTG d.o.o. iz Tomislavgrada obavijestila Tužilaštvo Bosne i Hercegovine

Almedin ŠIŠIĆ

SARAJEVO - Firma BGT iz Tomislavgrada, čiji raniji ugovor o nabavci goriva sa Ministarstvom odbrane (MO) BiH istražuje Državna agencija za istrage i zaštitu BiH (SIPA), žalila se na novi postupak nabavke takođe goriva za potrebe ovog ministarstva, a koji je težak 2,6 miliona maraka.

MO je nedavno sa kompanijom "HIFA Petrol" sklopio ugovor o jednogodišnjoj nabavci goriva, a iz ove institucije potvrđuju da su ovaj postupak pratili prigovori.

"Tačno je da su podneseni prigovori od strane firme 'Green oil' d.o.o. Sarajevo i BGT d.o.o. Tomislavgrad. Prigovor od strane BGT Tomislavgrad je djelomično usvojen", kažu u MO BiH.

Još prije godinu Milenko Šego, glavni državni revizor, dostavio je SIPA dokaze o kršenju propisa i procedura u slučaju ugovora MO BiH i firme BGT iz 2012. godine.

Kako su mediji tada izvijestili, sporno je oko 300.000 KM, koliko je navodno ukradeno na gorivu.

Glavni revizor je naveo da je MO BiH ugovorom o kupoprodaji od 28. februara 2012. godine s preduzećem BTG d.o.o. iz Tomislavgrada dogovorio isporuku 530.000 litara goriva.

To je upola manje nego što je predviđeno novim ugovorom.

Iz SIPA su "Nezavisnim" potvrdili da su ranije od Ureda za reviziju institucija BiH "zaprimiti informaciju o mogućim nepravilnostima prilikom nabavke goriva za potrebe MO BiH od firme BTG d.o.o. iz Tomislavgrada, o čemu je obaviješteno i Tužilaštvo BiH".

"Polijski službenici SIPA, shodno uputama postupajućeg tužioca, preduzimaju mjere i radnje iz svoje nadležnosti na utvrđivanju činjenica u vezi sa zloupotrebama s naprijed nave-



**PRIGOVOR  
FIRME BGT  
DJELIMIČNO  
USVOJEN**

# Ugovor osporava firma pod istragom!



**Cijene**

- Iz MO kažu da je ugovorom sa "HIFA Petro-lom" dogovorena kupovina goriva po cijenama nižim za 0,23 do 0,32 po litri, u za-višnosti od vrste goriva u odnosu na tržišnu malo-prodajnu cijenu. (Fena)

denim. Budući da su istražne radnje u toku, molimo da se za sve druge informacije obratite Tužilaštvu BiH koje je jedino ovlašteno za ustupanje istih", kazali su iz SIPA.

**2,6 MILIONA  
Novi ugovor  
o nabavi goriva  
težak 2,6  
miliona KM**

Iako smo iz Tužilaštva BiH na odgovor čekali pet dana, na kraju nam je odgovoreno da "Tužiteljstvo BiH ne može dati nikakav komentar na navedeni upit".

Dušanka Majkić, predsjedavajuća Zajedničke komisije za odbranu i sigurnost Parlamentarne skupštine BiH, vjeruje da bi i nova nabavka goriva mogla da bude sporna.

"S obzirom na to da i u prošlom slučaju nije bilo nikakve sankcije, to je očito mogući motiv da se obavi slična nabavka", rekla je ona.


Dodala je da je svaka nabavka goriva u MO BiH "slučaj za sebe".

"Taj raniji sporni ugovor je urađen tako što su zaključene cijene za jedan period i tada nije vršena nabavka, a onda

kad je gorivo poskupjelo počela je kompletna nabavka", istakla je ona, naglasivši da u Tužilaštvu BiH postoji veliki broj predmeta koji se vode protiv MO BiH, ali da nijedan još nije završen.

Poručila je da u MO BiH ima previše problema.

"Ja više nemam povjerenja da će se bilo šta sankcionisati u MO jer su prošle istrage pokazale da ih Tužilaštvo BiH zapravo motiviraju da tako rade", zaključila je Majkićeva.



Faksimil oglasa o nabavi goriva iz "Službenog glasnika BiH" br. 14: Ugovor zaključen kroz tri ljeta